

30 AUG 1997

Merdeka-Bendera

BENDERA MALAYSIA KINI BERNAMA "JALUR GEMILANG"

KUALA LUMPUR, 30 Ogos (Bernama) -- Bendera Malaysia yang menjadi simbol kebanggaan rakyat dengan rasminya diberikan nama "Jalur Gemilang" beberapa minit sebelum jam 12 tengah malam sempena sambutan Hari Kebangsaan ke-40.

Perdana Menteri Datuk Seri Dr Mahathir Mohamad mengisytiharkan nama itu di hadapan puluhan ribu rakyat yang berkumpul di Dataran Merdeka di sini untuk sama-sama meraikan detik bersejarah itu.

Sebelum itu, Dr Mahathir menerima bendera negara dari peserta Larian Bendera, Larian Obor Patriotik dan Motorton

Pada tepat 12 malam, "Jalur Gemilang" dikibarkan dengan diiringi laungan "Merdeka" para hadirin diikuti nyanyian lagu "Negeraku".

Yang turut hadir ialah isteri Perdana Menteri Datin Seri Dr Siti Hasmah Mohd Ali dan beberapa menteri Kabinet.

Bendera Malaysia yang berasal daripada bendera Persekutuan Tanah Melayu dikibarkan secara rasmi di seluruh negara sebagai lambang kelahiran Malaysia pada 16 Sept, 1963.

Satu pertandingan telah diadakan bagi memilih bendera yang dianjurkan oleh Majlis Perundangan Persekutuan pada tahun 1949.

Hujan renyai-renyai yang turun tidak melemahkan semangat ribuan rakyat untuk menunggu jam besar di Bangunan Sultan Abdul Samad berbunyi pada 12 malam menandakan 31 Ogos.

Sambutan malam merdeka diserikan dengan pelbagai persembahan kebudayaan dan kesenian berwarna-warni yang disusun Kementerian Kebudayaan, Kesenian dan Pelancongan bermula 8.45 malam.

Ini termasuk persembahan dokumentari "Diari Merdeka", persembahan khas oleh tentera laut, tentera darat dan Pasukan Simpanan Persekutuan serta nyanyian oleh beberapa artis tempatan seperti Siti Nurhaliza, Zainal Abidin dan Datuk S.M Salim.

Kemeriahan malam merdeka turut diserikan dengan persembahan drama tari, lawak jenaka dan kesenian tradisional seperti makyong, wayang kulit dan dikir barat.

Penonton juga dihiburkan dengan pertunjukan bunga api yang menerangi ruang angkasa Kuala Lumpur. -- BERNAMA

MT NY FAZ